

# NEWSLETTER YA DITHO

2021 FIRST EDITION



## Setho se Ratehang

**K**a mora selemo se bosula le se bohloko sa 2020, kaofela re shebile pele hore dintho di tla tsamaya hantle ka 2021, ka tshepo ya hore 2021 e tla tlisa diphetoho tse itseng tse ntle. Ekare ntse re tswelapele ka 2020 ka lebaka la ho kgutlela mokgahlelong wa 3 wa ho kginwa ha metsamao ka lebaka la ho eketseha ha ditshwaetso tsa COVID-19 le keketseho ya batho ba hlokaahalang.

Leha ho le jwalo, ha se hore dintho di tla tswelapele di le mpe hobane ho na le kgatelopele e entsweng ho fumana diente mme le palo ya ba tshwaetswang letsatsi le letsatsi e se qadile ho fokotseha. Ditaba tse monate ke hore boholo ba seo re se tsebang mabapi le ho fokotsa menyetla ya ho ata ha sewa sena ke nnete. Ka hona, haeba re tswelapele ho dula re sa atamelane, ho apara dimonkwana le ho hlapa matsoho kapa ho sebedisa sebolaya dikokwanahloko, re fokotsa kotsi ya ho tshwaetswa kapa ho atisa vaerase ena.

Re le Letlole, re dula re ikemiseditse ho le beha pele ho tsohle, lona ditho tsa rona. Le hoja ho bile boima ka 2020, seo ha se a ka sa re thibela ho batla mekgwa e ntlafetseng ya ho finyella ditho tsa rona. Lenaneo la Masibambisane Rewards le thakgotsweng ka 2020 ke mohlala o le mong feela wa kamoo le re susumetsang kateng hore re intlafatse. Re o kgothaletsa hore o sebedise dikhupone tse ka bukaneng ya Lenaneo la Masibambisane Rewards kaha dikhupone tseo di tla fellwa ke nako ka March 2021. Re lebeletse ho aba dibukana tse ntjha tse tla fellwa ke nako ka July 2021 hore o thabele meputso e eketsehileng. Di lebelletse o be o botse bahiri ba hao ka tsona ho netefatsa hore o ba le bukana ya moraorao.

Ke boetse ke rata ho tlaleha hore ditatamente tsa melemo ya ho ba setho (bakeng sa selemo se fedileng ka December 2019) di abuwe kotareng ya ho qetela ya 2020 mme di tlameha di fihlile matsohong a basebetsi bohle mafelong a November 2020. Re a utlwisisa hore na ditatamente tsena ke tsa bohlokwa hakae ho wena mme re o kgothaletsa hore o botse bahiri ba hao ka tsona haeba o so fumane setatamente sa hao.

Kgatisong ya lesedinyana lena, re tlo bua ka diphetoho tse tlang tsa lekgetho la lekeno, bohlokwa ba ho fumana dintlha tsa boiteanyo tsa ditho, metjha eo wena kapa bajalefa ba ka e sebedisang ho kenya dipotso le/kapa ditlitlebo hammoho le ditaba tse ding tse thahasellisang.

Re ke ke ra tseba ka ho feletseng le hona ho utlwisisa dintho tseo selemo se setjha se re fuparetseng tsona, empa ke kgodisehile hore ha re sebedisana mmoho, re ka finyella dintho tse itseng tsa bohlokwa haholo.

**E se e ka o ka ba le selemo se bolokehileng sa 2021!**

Phetoho ya lekgetho ho tloha ka la 1 March 2021 – e amang ditho tsa Letlole la ho beha meja fatshe

Bohlokwa ba ho fumana dintlha tsa boiteanyo le ho fana ka tlhahisoleseding ya moraorao ya tsona

Metjha ya Dipotso le Ditlitlebo e ka sebediswang ke ditho

Tshebetso ya letsete la rona ka 2020

# Phetoho ya lekgetho ho tloha ka la 1 March 2021 – e amang ditho tsa Letlole la ho beha meja fatshe

**H**o tloha ka la 1 March 2021, melemo yohle ya ho beha meja fatshe e lefuwang ke matlole a ho beha meja fatshe le matlole a paballo ya ho beha meja fatshe e tla tshwarwa ka tsela e tshwanang le ya melemo e lefuwang matloleng a penshene, matlole a paballo ya penshene le matlole a anuithi ya ho beha meja fatshe. Sena se bolela hore phapang e teng dipakeng tsa matlole a ho beha meja fatshe le matlole a penshene ha e sa tla ba teng ho tloha ka la 1 March 2021, ho bolelang hore tefo ya setho e lefuwang matloleng ana le melemo e tla lefuwa ho tswa matloleng ana e tla nkwa e tshwana hantle.

## DITHO TSA MATLOLE A HO BEHA MEJA FATSHE LE MATLOLE A PABALLO YA HO BEHA MEJA FATSHE DI TLA LOKELA HO:

### Reka penshene ha di beha meja fatshe:

- Ditho tse behang meja fatshe tsa matlole a ho beha meja fatshe le tsa matlole a paballo ya ho beha meja fatshe di tla lokela ho sebedisa 2/3rd ya dipoloko tsa bona ho reka dipenshene/anuithi tse tlamang.
- Molao wa karolo ya 1/3rd ya melemo ya tjehele e kontane e le phapanyetsano le karolo ya 2/3rd ya melemo ya anuithi o tla sebetsa melemong yohle ya ho beha meja fatshe, ntle le moo melemo yohle ya ho beha meja fatshe e leng R247 500.00 kapa ka tlase.

### Melemo ya ba finyeletseng dilemo tse hlokaahalang e sireleditswe:

Dipoloko tsohle kapa leha e le dife tse bokeletsweng letloleng la ho beha meja fatshe ka la 1 March 2021 (seo ho thweng ke "T-Day") di tla sireletswa e le akhaonte ya molemo o loketseng setho se finyeletseng dilemo tse hlokaahalang mosebetsing, e tla bolokwa mme e ke ke ya angwa ke diphetoho. Setho se tla ba le tokelo ya ho hula melemo yohle ya dilemo tse hlokaahalang tseo a di finyeletseng akhaonteng ya setho ya ho beha meja fatshe. Setho se tla hlokwa ho reka penshene/anuithi ka karolo ya 2/3rd ya dipoloko tseo a di bokeletseng tefong ya setho le ho holeng ha tjehele ho bileng teng ho tloha ka la 1 March 2021 (akhaonte ya melemo ya motho ya sa finyellang dilemo tse hlokaahalang).

### Mohlala:

*Setho sa hajwale sa letlole la ho beha meja fatshe se behang meja fatshe (ka mora ho fihla dilemong tse tlwaelehileng tsa ho beha meja fatshe) ka la 31 March 2025 se tla fumana melemo ya akhaonte ya setho se finyeletseng dilemo tse hlokaahalang hammoho le akhaonte ya setho se sa finyellang dilemo tse hlokaahalang Letloleng. Akhaonte ya melemo e fuwang setho se finyeletseng dilemo tse hlokaahalang e entswe ka dipoloko tsohle tse bokeletsweng le kgolo ya yona ho fihlela ka la 1 March 2021. Akhaonte ya melemo e fuwang setho se sa finyellang dilemo tse hlokaahalang e entswe ka ditefo tsohle tsa setho tse bokeletsweng tse lefuwang Letloleng ho tloha ka la 1 March 2021, hammoho le kgolo ya yona, ho fihlela ka letsatsi leo a behang meja fatshe ka*

*lona. Setho sena se behang meja fatshe se tla ba le tokelo ya ho fumana tjehele kontane, melemo ya akhaonte ya setho se finyeletseng dilemo tse hlokaahalang hammoho le karolo ya 1/3rd ya melemo ya akhaonte ya setho se sa finyellang dilemo tse hlokaahalang, ntle le ha akhaonte ya melemo ya setho se sa finyellang dilemo tse hlokaahalang e le ka tlase ho R247 500.00, moo tjehele yohle e ka nkwang kaofela kontane.*

### Kgahlamelo ya diphetoho tsa lekgetho:

- **Ho ditho tsa hajwale tsa matlole a ho beha meja fatshe tse ka tlase ho dilemo tse 55:**  
Ditho tse ka tlase ho dilemo tse 55 ka la 1 March 2021 di tla angwa ke diphetoho tsena kaha Letlole la bona le tla tlameha ho etsetswa diakhaonte tse pedi, e leng akhaonte ya melemo ya setho se finyeletseng dilemo tse hlokaahalang le akhaonte ya melemo ya setho se sa finyellang dilemo tse hlokaahalang.

Empa ditho tsena ha di na ho ameha ho hang haeba di ka ikgula matloleng a tsona ka ho dihela, ho lelekwa mosebetsing, ho fokotswa mosebetsing, jj. Ba tla dula ba na le tokelo ya ho teleima melemo yohle ya bona e le tjehele e kontane.

- **Ho ditho tsa hajwale tsa matlole a ho beha meja fatshe tse dilemo di 55 kapa ka hodimo ka la 1 March 2021:**  
Ditho tse dilemo di 55 kapa ho feta ka la 1 March 2021 di ke ke tsa angwa ke diphetoho tsena ho hang. Letlole le tsa tswelapele ho boloka akhaonte e le nngwe bakeng sa bona, e leng akhaonte ya ditho tse finyeletseng dilemo tse hlokaahalang. Melemo ya bona e bokeletsweng e tla tshwarwa ho latela melao e sebetsang hajwale, hafeela ba dula letloleng le tshwanang kapa ha ba boloka molemo o bokeletsweng. Haeba ba tlosa melemo ya bona letloleng la pele ho e isa letloleng le leng, ba tla tswela pele ka melemo ya akhaonte ya setho se finyeletseng dilemo tse hlokaahalang, empa letlole la bona le letjha le tla lokela ho etsa akhaonte ya bobedi ya setho se sa finyellang dilemo tse hlokaahalang, e leng yona eo ditefo tsohle tsa setho ho tloha ha a fetela letloleng leo, di tlang ho behwa teng mmoho le kgolo ya tsona. Akhaonte ena e tla sebetswa ho latela molawana wa phapanyetsano wa karolo ya 1/3rd le 2/3rd.

- **Basebetsi ba batjha:**  
Basebetsi bohle ba batjha ba kenang matloleng a ho beha meja fatshe ho tloha ka la 1 March 2021 ba tla tlangwa ke diphetoho tsena mme Letlole le tla ba le akhaonte e le nngwe ya setho se sa finyellang dilemo tse hlokaahalang; e leng se bolelang hore ha ba beha meja fatshe, ba tla lokela ho sebedisa karolo ya 2/3rd ya dipoloko tsa bona tsa ho beha meja fatshe ho reka penshene.

Haeba o ka ba le dipotso leha e le dife tse tobileng tabeng ena, ka kopo o se ke wa tsilatsila ho iteanya le Letlole.





# Bohlokwa ba ho fumana dintlha tsa boiteanyo le ho fana ka tlhahisoleseding ya moraorao ya tsona

**B**oto ya di-Trustee tsa MWPF e nka boikarabelo ba yona ba ho o emela e le ba bohlokwa ho netefatsa hore o fumana lesedi le nepahetseng le hore nako le nako o fumane tlhahisoleseding ya moraorao ka letlole la ho beha meja fatshe le ditaba tse ding tse amanang le indasteri ena. Ho feta mona, MWPF e laolwa ke molao ho netefatsa hore o fuwa tlhahisoleseding e lekaneng le e loketseng e o tsebisang ka ditokelo tsa hao, melemo le dintho tseo o lokelang ho di etsa tumellanong le melao ya Letlole.

Nakong e fetileng re nnile ra sebedisa nako e ngata le ho etsa boiteko bohle ho netefatsa hore o fumana tlhahisoleseding e lekaneng ka masedinyana, diphousetara, maqetshwana le ka matsholo a di SMS. Ka lebaka la COVID-19, ho aba metjha ena ya puisano e bile bothata kaha maeto a fanang ka tlhahisoleseding a etsetswang ditho ha a etswe jwalo ka tlwaelo. Ha maeto ana a fanang ka tlhahisoleseding a le siyo, re itshetleha haholo ka puisano ya dijithale e akareletsang

SMS, imeile le ho ngola tlhahisoleseding webosaeteng ya rona. Ho phaella mona, ho thakgotswe app ka 2020. App ena e o dumella hore o fumane tlhahisoleseding e amanang le Letlole ha o penya selefounu ya hao.

Leha ho le jwalo, bothata bo boholo ke hore ha re na dinomoro tsa selefounu tsa ditho tsa rona kaofela. Ka hona, re hloka thuso ya hao. Re tlo etsa boikitlaetso ba ho kenya dintlha tsa moraorao tsa ditho tsa rona kotareng ya pele ya selemo sena. Re kopa hore o fane ka dintlha tsa hao tsa boiteanyo ho Letlole ka metjha ya puisano e fanweng.

Letlole le tla sebedisa dintlha tseo tsa boiteanyo bakeng feela sa merero ya ho fetisa tlhahisoleseding e amanang le Letlole, tumellanong le boitlamo ba molao ba Letlole hore le etse jwalo. Ha re se na dintlha tsa boiteanyo, re sitwa ho phethahatsa boitlamo bona ba rona ba puisano ka nepo.

## Metjha ya Dipotso le Ditletlebo e ka sebediswang ke ditho



**M**WPF e file wena le bajalefa ba hao metjha e mmalwa kapa mekgwa eo o ka romelang kapa wa kenya dipotso le ditletlebo ka yona mabapi le Letlole le melemo ya lona. Mokgwa wa pele ke wa Dikhonsaletente tsa Employer Based Service (EBS) tse fumanehang ka ho toba merafong. Bakeng sa merafo e se nang Dikhonsaletente tsa EBS, o ka iteanya le Setsi sa Boiteanyo sa MWPF, moo dikhonsaletente tsa rona tse fanang ka thuso di fumanehang ho tloha ka 08h00 ho fihlela ka 16h30 matsatsing a mosebetsi hara beke.

Re boetse re na le metjha ya dijithale e kang webosaete ya rona ya [www.mwpcf.co.za](http://www.mwpcf.co.za), metjha ya marangrang ya Facebook le Twitter: @mineworkerspf le imeile tseo kaofela di laolwang ke dikhonsaletente tse nang le bokgoni tse ikemiseditseng ho rarolla dipotso kapa ditletlebo ka potlako

Hape re na le phothale ya inthanete ya ho kenya ditletlebo ho thusa ba batlang ho kenya ditletlebo ka Letlole, e le hore ho sebediswe motjha o akaretsang o sebakeng se le seng bakeng sa ho fumana dikarabo ka potlako le ho rarolla ditletlebo. E fana ka motjha o tobileng o yang ofising ya Mookamedi ya ka Sehloohong wa Letlole. Wena le bajalefa ba hao le kgothaletswa hore le sebedise motjha ona wa phothale ya ditletlebo o inthaneteng pele le ka ya metjheng ya phatlalatso ya ditaba kapa ho maqwetha moo le tlang ho lefa ditjhelete tse sa hlokalaheng. Re ikemiseditse ho o

thusa ka potlako ka dinako tsohle empa re ke ke ra kgona ho etsa jwalo haeba metjha ena e sa sebediswe.

Haeba o ikutlwa o sa kgotsofala ke tsela eo Letlole le lekileng ho rarolla ditletlebo tsa hao ka yona, o ka iteanya le Ofisi ya Boahlodi ya Letlole la ho Beha Meja Fatshe ([www.pfa.org.za](http://www.pfa.org.za)). Aterese ya bona ya imeile ke [enquiries@pfa.org.za](mailto:enquiries@pfa.org.za). Boahlodi ba Letlole ho Beha Meja Fatshe le fana ka ditshebeletso ntle ho tefo ho setjhaba.

**Leba metjheng e latelang haeba o na le dipotso kapa ditletlebo.**

**Imeile:** [clientservices@mineworkers.co.za](mailto:clientservices@mineworkers.co.za)  
**Setsi sa Mehala:** 010 100 3001

### Dikhonsaletente tsa EBS:

- Anglo Gold Ashanti: Vaal Reefs (Orkney) West Wits (Carletonville)
- Glencore Mine: Witbank
- Sibanye Still Water: Beatrix
- Sibanye Still Water: Driefontein
- Sibanye Still Water: Ezulwini
- Harmony Gold Mine: Kusasaletu
- Harmony Gold Mine: President Steyn Branch

**Phothale ya Ditletlebo:** <https://complaints.mwpcf.co.za/>

# Tshebetso ya letsete la rona ka 2020

Ho sa tsotellehe ho fetofetoha ho tswelang pele ha mmaraka wa ditjhelete le ho se tsitse ha moruo ho bileng teng ka lebaka la COVID-19 ka 2020, Letlole le ntse le kgonne ho etsa tswala letseteng.

**Sheba tshebetso ya letsete e bontshitsweng theiboleng e ka tlase:**

## Investment Portfolio Performance

	Target Benchmark	MWPF Core Portfolio	MWPF Market Linked Portfolio	Mineworkers Provident Fund
1 Months	0.38%	0.43%	3.03%	2.00%
3 Months	1.55%	1.01%	7.50%	4.72%
6 Months	4.70%	2.05%	8.43%	5.55%
YTD	7.67%	1.24%	8.59%	5.21%
1 Year	7.67%	1.24%	8.59%	5.21%
2 Years (annualised)	7.86%	2.81%	10.33%	6.79%
3 Years (annualised)	8.47%	3.47%	6.14%	5.24%
4 Years (annualised)	8.63%	4.64%	7.97%	6.60%
5 Years (annualised)	9.13%	5.22%	8.43%	7.36%
Inception (annualised)	9.93%	12.06%	14.33%	12.90%
Volatility (annualised)	1.64%	2.21%	9.20%	4.98%
Tracking Error	-	-	-	8.48%

Dinako tse boima moruong kamehla di latelwa ke ho iphumana hape, e leng lona lebaka leo dipoloko tsa ditho tsa ho beha meja fatshe di tsetelwang nako e telele. Di-Trustee tsa rona di utlwisisa sena mme di lekalekanya ho sireletsa dipoloko tsa ditho ha moruo le letsete di bonahala di hula ha boima. Re dula re tshepile hore re tla bona matshwao a ho iphumana hape le ho ntlafatsa tshebetso ka 2021.

## Setsi Seo Motho a ka Yang ho Sona ka ho Toba se fetotse aterese

**Ka kopo elang hloko hore aterese ya Setsi Seo Motho a ka Yang ho Sona ka ho Toba sa  
MWPF Witbank e fetohetse atereseng e latelang:**

19 Geringer Street  
Del Judor  
Emalaheni  
1044  
Tel: 010 100 3000

## Re latele ho Facebook le Twitter ho dula o tseba ka tse etsahalang


 <https://www.facebook.com/mineworkerpf>


 <https://twitter.com/Mineworkerspf>

## Maikutlo a hao ke a bohlokwa ho rona

Re ka rata ho tseba ka maikutlo a hao. Ka kopo re tsebise hore o nahana eng ka newsletter ka ho re romela emeile ho: [externalcomm@mineowrkers.co.za](mailto:externalcomm@mineowrkers.co.za).

## Dintlha tsa ho ikopanya le kantoro ya ntlokgolo ya Letlole

 Mineworkers Provident Fund Building, 26 Ameshoff Street, Braamfontein, Johannesburg

 010 100 3001

 [www.mwvf.co.za](http://www.mwvf.co.za)

**Boipolelo ba ho se jare boikarabelo:** Tsebiso eo ho fanweng ka yona ngolotabeng ena e sireleditswe ka melao e amehang ya intellectual property mme e ke ke ya kopiswa, ya ajwa kapa ya fetolelwa ka mabaka a ho etsa kgwebo. Le ha ho entswe matsapa a ho netefatsa hore tsebiso e kentseweng mona e kgema le dinako, ha e na le leeme ebile e nepahetse, hona ho ke ke ha tiisetsewa. Tshebediso ya lesedi lena ke motho wa boraro e tla ba qetong ya motho wa boraro mme ke lebitsong la bonnete ba ditaba tsena feela. O koptjwa ho ela hloko hore haeba dikahare tsa ngolotaba ena ha di dumellane le Melao ya Letlole, ho tla latelwa Melao. MWPF ha e amohele boikarabelo bofe kapa bofe ba tahlehelo, ditshenyehelo le ditjeho, tse ka bang teng ka ho toba kapa ho se tobe ka lebaka la phoso kapa ho siuwa ha ntlha efe kapa efe e itseng.

